



Ils uffants da Sent han gnü plaschair da pudair far da magisters.

FOTO F. HOFMANN



Ils participants dal cuors han survgnì tuot las infuormaziuns be in rumantsch.

FOTO C. RAUCH

## «Ils participants lessan tuornar darcheu»

Bun bilantsch pella seguond'evna da rumantsch a Sent

DA FLURIN ANDRY / ANR

■ **Discuorrer ün'evna a l'inlunga be rumantsch, quist'impromischion han tgnü 40 participants al cuors da lingua a Sent. La metoda extraordinara per imprendere rumantsch plascha uschè bain cha'l cuors gnarà darcheu repeti.** Pella seguonda jada haja gnü nom durant ün'evna «a Sent be rumantsch». Ils 40 participants da quist cuors da lingua particular han impromiss in dumengia saira avant ot dis chi discuorran durant ün'evna be rumantsch. «L'on passà vaivna fat quist cuors pella prüma jada cun 36 partecipantas e partecipants», disch *Gianna Bettina Gritti*, commembra dal comité

d'organisaziun da quist cuors. Ils ulteriurs commembers d'eiran *Cristina Gregori, Andri Linsel, Angelika Overath, Manfred Koch e Cla Rauch*. «Sainza cha no vessan stuvü far recloma s'han annunzchats pel cuors d'ingon uschè blers cha no vain pudü resguardar be 40 annunzchas e stuvü metter a 16 persunas sülla glista d'aspet.» La mità dals partecipants dal cuors da quist on d'eiran da quels chi vaivan fat eir fingià il prüim cuors, tschella mità d'eiran novs partecipants.

### Mincha saira ün'otra occurrenza

Las reacziuns al seguond cuors sun statas, sco ch'ella disch, darcheu fich positivs: «I d'eira eir üna bun'atmosfera tant

pro'ls partecipants tanter pèr sco eir pro'ls partecipants e las famiglias indigenas.» L'avantmezdi frequentaivan las 40 scolaras e scolaras ils cuors da rumantsch: Cla Rauch instruiva ils partecipants, *Martina Noggler* quels dal s-chalin duos, *Corina Caviezel* vaiva surtul il s-chalin trais e *Madlaina Rauch* il s-chalin quatter. «Mincha saira vaivna organisà ün'occurrenza per tuots insembel», manzuna *Gianna Bettina Gritti*. In lündeschdi saira es gnü muossà ün film da la cineasta *Susanna Fanzun*. In mardi esa stat la saira da chanzuns rumantschas cun *Peder Rauch e Benedict Stecher*. «In marcurdi han cuschinà ils partecipants in differents gruppas a chasa pro famiglias indige-

nas trats engiadinais, els han eir pudü tschanar là.» In gövgia saira ha prelet l'autura *Leta Semadeni* plüssa da sias poesias.

### «Il punct culminant per blers la visita in scoula

Las 40 partecipantas e partecipants dal cuors han ün di eir pudü far la visita in chasa da scoula: Sclaras e scolaras da la 3. fin 9avla classa vaivan preparà per els differents temas e sportas. «Culla terza classa hana p. ex. pudü imprendere üna poesia da Men Rauch, ils uffants chi d'eiran in quist mumaint ils magisters han preschantà la poesia, declerà ils plets e la pronunzcha e tils güdà ad imprendere our

dad oura la poesia», disch la commembra dal comité d'organisaziun, «i d'eira propcha bel a verer.» Ils scolaras da la 5. e 6avla classa han preschantà il cumün da Sent, dovrend üna lingua simpla e clera, per cha'ls principiants nu sajan surdumandats. «Sco ch'eu n'ha dudi es statta quista visita in scoula per blers dals partecipants da nos cuors il punct culminant.» In venderdi es lura statta la saira finala cun üna tschaina cumünai vla e musica da la Chapella Tasna. «Divers dals partecipants han dumandà schi nu's possan annunzchar fingià uossa pel prossem cuors», ha dit *Gianna Bettina Gritti*, «uschè chi darà dal 2014 il terz cuors: A Sent be rumantsch.»

## «Premi am pussibiltescha da realisar progets»

Flurina Sarott survain Premi da promoziun chantunal

DA FLURIN ANDRY / ANR

■ **Cun ot ons ha decis Flurina Sarott da Scuol da vulair imprendere a sunar la violina. La prüma jada sco solista ha ella concertà cun ün desch ons insembel cun l'Orchesterverein d'Engiadin'Ota.** Cur cha *Flurina Sarott* frequentaiva a Scuol la seguonda classa primara vaiva preschantà sia magistra da flöta *Brigitte Steinmann* ün orchester e dumandà chenün instrumaint ch'ella imprendess il plü gugent. «Eu n'ha muossà sülla gja, il cling da quel instrumaint

ch'eu vaiva dudi fingià illa televisiun am plaschaiva il plü bain, meglder co la flöta», as regorda la musicista. Cur ch'ella ha dit quai a chasa d'eiran seis genituors il prüim ün pa stuts, «ma davu m'hana adüna sustgnüda». Cumanzà a tour uras da gja ha ella cun ot ons pro *Reto Faedi* da la Scoula da musica d'Engiadina Bassa. Cur cha quel es i davent ha la matta da Scuol cuntinuà cullas lecziuns da gja in Engiadin'Ota e davu a Tavo.

### Fat il diplom «cun dinstincziun»

Cun ün desch ons ha'la pudü sunar la

prüma jada solista pro ün concert da l'Orchesterverein Oberengadin ed ün on plü tard ha guadagnà Flurina Sarott il Bündner Jugendmusikwettbewerb. Quai tilla ha pussibilità da pudair sunar solos eir culla Kammerphilharmonie grischuna sco eir per orchesters in Glaruna ed a Cervo in Italia. Parallelmaing ha la violinista fat a l'Institut Otalpin a Ftan la matura es preparada per l'examen d'admissiun pella Hochschule der Künste a Berna. Pro la professuressa *Monika Urbaniak* ha ella fat quista primavaira il Master of Music Performance cun di-

stincziun. «Quist diplom es la premissa per gnir ingaschada dad orchesters per ch'eu possa implü eir dar uras da gja fetscha uossa a Turich amo il diplom per pedagogia da musica.»

### «Premi gnü güst al dret mumaint»

La nouva ch'ella survegna dal chantun il premi da promoziun dotà cun 20 000 frans es statta per Flurina Sarott üna gronda surpraisa: «Eu n'ha gnü ün grond gust da quist'onur. Ils raps possa dovrar fich bain per am finanziar il seguond stüdi, els am pussibilteschan però eir da realisar progets musicals cun collegas.» Davo il stüdi less ella provar da survgnir üna piazza in ün bun orchester e dar lecziuns da gja. Ella spera eir ch'ella possa cuntinuar a dar blers concerts, «in duets e musica da chombra, quai ch'eu fetsch vairamaing il plü gugent». Seis böt füs da pudair sunar ün pa dapertuot, eir in Grischun ed in Engiadina Bassa sco eir minchatant a l'ester.

### «Averta eir per experimentar cun otra musica»

La violinista exercitescha mincha di quatter fin ses uras. Quai es, sco ch'ella disch, eir necessari: «La concurrenza es nempe fich gronda, per üna piazza attractiva s'annunzchan fin tschient musicistas e musicists.» Flurina Sarott suna impustüt musica classica, daspö cuort suna ella minchatant eir jazz. «Schi gnissan dumondas da bands chi fan pop da sunar, lura nu füssa quella chi dschess da na. Quists experimaints surour ils cunfins dals stils sun interessants.» Cha tscherts da seis collegas dian cha quai nu gnia in dumonda, chi

saja da restar pro la musica seriosa, manzun'la, «da quel avis nu suna però, in meis temp liber taidla vairamaing plütost pop co classica per avoir ün tschert equiliber, causa cha musica classica suna tuotta di.» Davo il stüdi actual pudess Flurina Sarott far eir amo il diplom da solista: «Eu sun landervia a stübgjar sch'eu nu less far güst eir amo quel, scha pussibel inlur a l'ester», manzuna la musicista undrada cul Premi da promoziun chantunal, «quai füs üna schanza, perche cha lura füschan propcha tuot las portas avertas.»

### Cuort e bön

**Prenom:** Flurina  
**Nom:** Sarott  
**Data da naschentscha:** 7 october 1989  
**Insaina:** Balantscha  
**Manster:** Musicista  
**Hobbies:** Skis, kino, star pachific  
**Cumponists predilets:** Mozart e Sibelius  
**Trat predilet:** Bizzocals in lat  
**Bavronda prediletta:** Tschigulatta choda cun gromma



D'exercitar esa cura ed ingio chi s'ha l'ocasiun – Flurina Sarott a chasa a Scuol in chadafö.

FOTOS F. ANDRY